



GIPUZKOAKO FORU ALDUNDIA

OGASUN ETA FINANTZA DEPARTAMENTUA

574/2014 FORU AGINDUA, urriaren 28koa, Gipuzkoako Foru Aldundiak ematen duen pasahitz operatiboa arautzen duena.

ZIOEN AZALPENA

Pasahitz operatiboa, identitatea frogatzeko bitarteko gisa erabilia, 2003. urtean ezarri zen Gipuzkoan, 107/2003 Foru Dekretua eta 285/2004 Foru Agindua direla medio. Lehen pasahitz operatibo horrek Ogasun eta Finantza Departamentuaren aurrean jarduteko baino ez zuen balio.

Geroago, 2006. urtean, 40/2006 Foru Dekretua eta 823/2006 Foru Agindua onartu ziren, eta haien bidez Gipuzkoako Foru Aldundi osora zabaldu zen pasahitz operatiboaren eremu objektiboa, baita haren entitate autonomo eta ente publikoetara ere.

2010. urtean, irailaren 28ko 23/2010 Foru Dekretua onartu zen, Foru Administrazioaren eremuan bitarteko elektronikoen erabilera arautzen duena. Bada, erabilera horretan, pasahitz operatiboaren bitartez identifikatzea guztiz funtsezkoa gertatzen da. Identitatea eta ordezkaritza Foru Administrazioaren aurrean frogatzeko erregulazioari dagokionez, aipatutako foru dekretuak 40/2006 Foru Dekretura igortzen gaitu.

Azkenik, bitarteko elektronikoak erabiltzean identitatea eta ordezkaritza frogatzekoak berariazko problematika bat eratzen duen aldetik, urriaren 14ko 32/2014 Foru Dekretuak hainbat aldaketa sartu ditu 23/2010 Foru Dekretuan. Aldaketa horiek oinarritzko erregulazioa gehitu diote 23/2010 Foru Dekretuko artikulatuari, harreman elektronikoetan identitatea eta ordezkaritza frogatzeko erari dagokionez. Zehazki, bigarren tituluko IV. kapitulua aldatzen du (bitarteko elektronikoak erabiltzean identitatea frogatzea eta autentifikatzea), eta indarrrik gabe uzten du 40/2006 Foru Dekretua, identitatea eta ordezkaritza frogatzeari buruzkoa.

Idazketa berriaren arabera, 23/2010 Foru Dekretuaren 22.2 artikulua dio pasahitz operatiboaren berriazko erregulazioa Ogasun eta Finantza Departamentuko foru agindu bidez onartuko dela. Bada, gaikuntza horren indarrez argitaratzen den foru agindu honen bidez araututa uzten da nola erabili behar den pasahitz operatiboa pertsona fisiko eta juridikoen identitatea eta haien jarduketa telematikoak Foru Administrazioaren aurrean frogatu eta autentifikatzeko.

Foru agindu honetan arautzen den pasahitz operatiboak ezaugarri nagusi hauek ditu:

— Pasahitz operatiboari beharkizun teknikoak gehitu zaizkio sinadura elektroniko aurreratua izan dadin. Hortaz, Gipuzkoako Foru Aldundiak orain arte eman dituen pasahitz operatibo guztiak sinadura elektroniko aurreratutzat hartzen dira.

— Haren erabilera onartzen duen edozein erakundetara zabaltzen da pasahitza, administrazio elektronikoa Gipuzkoa osoan bultzatu nahi delako.

— Adingabeek eta juridikoki ezgaituek ezin dute pasahitz operatiborik eduki. Harreman telematikoetan, pertsona horiek legezko ordezkarien bidez jardun behar dute.

— Desagertzen da pasahitz operatiboa webgunetik eskatzeko tramitea.

— Indarraldia lau urtera zabaltzen da. Horrela, pasahitz operatiboaren balioaldia parekatu egiten da sinadura elektroniko balioztatuko ziurtagirietarako onartuta dagoen gehieneko balio-aldiarekin.

Horiek horrela, hau.

XEDATZEN DUT:

1. artikulua. Pasahitz operatiboa.

Gipuzkoako Foru Aldundiak ematen duen pasahitz operatiboa sinadura elektroniko aurreratuaren sisteman sartzen da. Interesatuta dagoen pertsonari aukera ematen dio harreman telefoniko zein elektronikoetan bere burua identifikatzeko, bai eta agiriak autentifikatzeko ere kasuan kasuko prozedurak hala onartzen duenean.

Gipuzkoako Foru Aldundiarekiko harremanetan eta haren erabilera onartzen duten beste erakundeekikoetan onartuko da pasahitz operatiboa.

2. artikulua. Pasahitz operatiboa eskura dezaketen pertsonak.

1. Irailaren 28ko 23/2010 Foru Dekretuak, Foru Administrazioaren eremuan bitarteko elektronikoen erabilera arautzen duenak, 22.1 artikuluan aipatzen dituen pertsonak eskura dezakete pasahitz operatiboa.

2. Ez daude pasahitz operatiboa eskuratzeko moduan honako hauek:

a) Nortasun juridikorik gabeko entitateak, martxoaren 8ko 2/2005 Foru Arauak, Gipuzkoako Zergen Arau Orokorrak, 35.3 artikuluan aipatuak.

b) Gipuzkoako Foru Aldundiarekiko harremanetan sinadura elektronikoko balioztatuaz hornitutako ziurtagiria erabiltzera behartuta dauden kolektiboak.

c) Ordezkaritza mankomunatuak duten pertsona juridikoak, edo ordezkaritza kolegiatuko organoak dituztenak, azken horiek kontseilari delegaturik izendatu ez badute.

3. artikulua. Pasahitz operatiboa fisikoki bertaratuta eskatzea.

1. Gipuzkoako Foru Aldundiaren egoitza elektronikoan eta Ogasun Departamentuaren webgunean argitaratuko da herritarren arretarako zer bulegotan eskatu daitekeen pasahitz operatiboa. Nolanahi dela ere, pasahitz operatiboa beti eskatu ahal izango da bai Ogasun eta Finantza Departamentuko herritarren arretarako bulegoetan eta bai Gipuzkoako Foru Aldundiaren Jauregian kokatuta dagoen arreta bulegoan.

2. Pasahitz operatiboa pertsona fisiko batek eskuratu nahi badu, aukeratutako herritarren arretarako bulegoan agertu behar du haren identitatea egiazta dadin. Horretarako, agiri hauetako bat eraman behar du:

— Nortasun agiria edo pasaporteak.

— Europar Batasuneko estatuetakoko herritarrentzat jatorrizko estatuan onartuta dagoen identifikazio agiria.

— Atzerriko pertsonaren identifikazio zenbakia jasotzen duen agiria, gainerako kasuetan.

— Zuzenbidean ondorio hauetarako onartuta dagoen beste edozein dokumentu.

3. Pasahitz operatiboa pertsona juridiko batek eskuratu nahi badu, legezko ordezkaritza inskribatuta eduki behar du Gipuzkoako Foru Aldundiko legezko ordezkarien erroldan. Interesdunaren legezko ordezkariek –pertsona fisikoak–, berak aukeratutako herritarren arretarako bulegora joan behar du bere identitatea egiazta dadin aurreko puntuan adierazitako moduan.

4. Pasahitz operatiboa eskuratzek dakartzkion eskubide eta betebeharren zerrenda aurkeztu behar du, behar bezala sinatuta, interesdunak. Bidezko agiri normalizatua eskuragarri egongo da bai egoitza elektronikoan eta bai Ogasun Departamentuaren webgunean.

4. artikulua. Pasahitz operatiboa agiri notarial bidez eskatzea.

1. Interesdunak ez du zertan fisikoki agertu behar, notario aurrean honako hau adierazten duenean:

a) Pasahitz operatiboa eskuratzeko borondatea duela.

b) Pasahitza eskuratzek dakartzkion eskubide eta obligazioak ezagutzen eta onartzen dituela.

c) Hirugarren pertsona bat baimentzen duela aurreko artikuluan aipatutako dokumentazioa aurkeztu eta pasahitz operatiboa bere izenean jaso dezan.

2. Pasahitz operatiboa tramitatzeko hirugarren pertsona bati eman beharreko baimen notarialaren agiri normalizatua eskuragarri egongo da bai egoitza elektronikoan eta bai Ogasun Departamentuaren webgunean.

5. artikulua. Pasahitz operatiboa ematea.

1. Identifikazio zenbakiak, autentifikazio eta sinadura gakoak, eta baieztapen gakoak osatzen dute pasahitz operatiboa. Identifikazio zenbakia pasahitz operatiboaren titularrak eta Foru Aldundiak ezagutuko dute. Autentifikazio eta sinadura gakoa eta egiaztapen gakoa kartazal itxian emango dira, eta pasahitz operatiboaren titularrak baino ez ditu ezagutuko.

2. Gipuzkoako Foru Aldundiarekiko harreman elektroniko eta telefonikoetan norberaren identitatea frogatzeko balio duen bitartekoa denez gero, pasahitz operatiboa eskatu eta eskuratzek berekin dakar haren titularrak baimena ema duela Foru Aldundiko fitxategietan hari buruz erregistratuta dauden identifikazio datuak gurutatu daitezen, behar bezala identifikatu eta autentifikatuko dela ziurtatzeko.

3. Titularrak autentifikazio eta sinadura gakoa aldatu behar du pasahitz operatiboa lehendabiziko aldiz erabiltzen duenean. Aldaketa hori nahitaezkoa da, eta pasahitza jaso ondorengo 30 egun naturalen barruan egin behar da. Epe hori igaro eta pasahitz operatiboa erabili gabe badago, baliorik gabe geratuko da.

4. Behin autentifikazio eta sinadura gakoa aldatuta, titularrak identifikazio zenbakia eta baieztapen gakoa aldatu ditzake. Aldaketa guztiak, hala autentifikazio eta sinadura gakoarena, nola identifikazio zenbakiari edo

baieztapen gakoari dagozkionak, «Gipuzkoatarian» egin behar dira, Gipuzkoako Foru Aldundiak tramiteak eta zerbitzuak internet bidez egiteko eskaintzen duen atarian.

6. artikulua. Pasahitz operatiboaren titularrak dituen betebeharrak.

1. Pasahitz operatiboa pertsonala da, eskuratu duen titularrak bakarrik erabili beharrekoa. Pasahitz operatiboa ematen zaion unetik aurrera, pertsona horrek haren zaintzaren erantzukizun osoa hartzen du bere gain, eta berak ere erantzungo du hura gaizki, behar ez bezala edo arduragabekeriaz erabiltzeak ekar ditzakeen ondorioengatik, pasahitza baliogabetzea eskatzen ez duen bitartean.

2. Pertsona juridikoen kasuan, eskatzaileak (hau da, pertsona juridikoaren legezko ordezkariak) izango du pasahitza zaintzeko ardura, eta pasahitza erabiliz gauzatutako jarduketa guztiak pertsona juridikoak egindakotzat joko dira. Pasahitza behar ez bezala erabiltzen bada, jarduketa horien ondorioak pertsona fisiko eskatzaileari egotziko zaizkio.

7. artikulua. Pasahitz operatiboa baliogabetzea eta baliagarritasuna galtzea.

1. Pasahitz operatiboa kasu hauetan baliogabetu eta galduko du baliagarritasuna:

a) Titularrak edo interes legitimoa duen hirugarren batek hala eskatzen duenean.

b) Pertsona fisiko titularraren heriotza gertatzen denean, edo pertsona juridikoa iraungitzen denean.

c) Eman zenetik 4 urteko epea igarotzen denean.

d) Pasahitza egin eta emateko egiaztatutako zirkunstantziak edo ordezkari-tzako ahalmenei buruzkoak aldatzen direnean, haiek errealitatearekin bat ez etortzeraino.

e) Pasahitz operatiboa galdu edo ebatsi denean.

f) Administrazioak ebazpen bidez hala erabakitzen duenean. Ebazpen horrek arrazoitua izan behar du.

2. d) eta e) kasuetan, titularrak eskatu behar du pasahitz operatiboa baliogabetzea, eta eskatzen den unetik beretik geratuko da baliogabetuta.

Horretarako, titularrak bere identitatea frogatu behar du, foru agindu honetako 3.2 artikuluan aipatzen diren agirietako edozein aurkeztuta, edo, eskaera telefonoz eginez gero, datu jakin batzuk emanda.

3. Gipuzkoako Foru Aldundiak beretzat gordetzen du pasahitz operatiboa deuseztatzeko eskubidea, okerreko sarrerak elkarren segidan egiten direnean, erabilera egokiari buruz edo identitatea edo ordezkaritza frogatzeko agirien indarraldiari buruz arrazoizko zalantzak daudenean, edo bestelako arrazoiak gertatzen direnean. Pasahitza deuseztatzeko, ebazpen arrazoitua eman behar du Ogasun eta Finantza Departamentuak, eta ebazpen hori deuseztatutako pasahitzaren titularrari jakinarazi behar zaio. Horri begira, Gipuzkoako Foru Aldundiaren barruan gorabeheraren bat ezagutzen bada pasahitz operatiboa deuseztatzeko arrazoi izan daitekeena, haren berri eman behar zaio Ogasun eta Finantza Departamentuari.

8. artikulua. Pasahitza berritzea.

Pasahitz operatiboa 4 urteko epea igarotzeagatik iraungita geratu baino lehen, titularrak hura berritzeko eskatu dezake, dela arreta bulegoan bertan, dela Gipuzkoako Foru Aldundiaren egoitza elektronikoaren bitartez.

Xedapen gehigarria.

2. artikuluan xedatutakoa kendu gabe, Ogasun eta Finantza Departamentuarekiko harremanak pasahitz operatiboaren bitartez egin nahi badira, ezinbesteko baldintza da departamentuaren beraren datu basean alta emanda egotea.

Xedapen indargabetzailea.

Indarrik gabe geratzen da irailaren 15eko 823/2006 Foru Agindua, herritarren eta Gipuzkoako Foru Aldundiaren arteko harreman telematiko eta telefonikoetan erabili beharreko pasahitz operatiboa nola eskatu arautzen duena.

Amaierako xedapena.

Foru agindu hau 2014ko azaroaren 11n jarriko da indarrean.

Donostia, 2014ko urriaren 28a.—Helena Franco Ibarzabal, Departamentuko foru diputatua. (9823)